

**Uunga siunnersuut: Soraarnerussutisiaqalernissamut aaqqissuussinermut
peqataasussaatitaaneq pillugu Inatsisartut inatsisaata allanngortinneqarnera pillugu
Inatsisartut inatsisaat**

Aningaasaqarnermut Naligiissitaanermullu Naalakkersuisumit saqqummiunneqartog

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerreqarneranut

ILASSUTITUT ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Hans Peter Poulsen, Siumut, siulittaasoq

Inatsisartunut ilaasortaq Jens Frederik Nielsen, Demokraatit, siulittaasup tullia

Inatsisartunut ilaasortaq A sii Chemnitz Narup, Inuit Ataqtigiit

Inatsisartunut ilaasortaq Hans Aronsen, Inuit Ataqtigiit, Mariia Simonsenimut sinniisussatut

Inatsisartunut ilaasortaq Kuno Fencker, Siumut

Inatsisartunut ilaasortaq Lars Poulsen, Siumut

Inatsisartunut ilaasortaq Jens Napaattooq, Naleraq

UKA 2022-mi ulloq 4. oktober 2022 siullermeerinninnerup kingorna ataatsimiititaliap sunnersuut misissorpaa.

1. Siunnersuutip imarisaa siunertaalu

Siunnersuut soraarnerussutisiaqalernissamut aaqqissuussinermut peqataasussaatitaaneq pillugu Inatsisartut inatsisaanni allannguutissanut sisamanut tunngavoq; allannguutit marluk erseqqissaataasut aammalu allannguutit marluk, oqaasertaliussinikkut 2022-mi aningaasanut inatsimmut ilanngunneqartut, matumuunakkut inatsimmut atuuttumut ilanngunneqartussatut siunnersuutigineqartut.

2. Siunnersuutip Inatsisartunit siullermeerneqarnera

Siunnersuut Inatsisartuni amerlanerussuteqartunit akuerineqarpoq. Inersuarmili oqallinneq tunngavigalugu ataatsimiititaliamit suliarineqartussanngorlugu siunnersuut Aningaasaqarnermut Akileraartarnermullu Ataatsimiititaliamut innersuuteqqinneqarpoq.

3. Ataatsimiititaliap siunnersuummik suliarinninnera

Partiit ataatsimiititaliami ilaasortaatitaqartut siunnersuummut tamarmik immikkut inassuteqaataannik allannngortitsinissamik siunnersuutip ataatsimiititaliamit suliarineqarnera tunngavissinngilaq.

Soraarnerussutisiaqalernissamulli aqqissuussinermut peqataasussaataaneq pillugu paasisitsiniaanermik sukumiisumik ingerlatsinissaq pingaaruteqarluinnarmat ataatsimiititaliamit isumaqatigiittumit sakkortunerpaamik iseqqissarneqassaaq. Tassunga atatillugu soraarnerussutisiaqalernissamut aqqissuussinerit toqusoqarnerani matussusiisinaanerat pillugu paasisitsiniaasoqarnissaanik assut pisariaqartitsisoqartoq Inatsisartut siunnersuummik suliarinninneranni ersersinneqarmat ataatsimiititaliamit erseqqissarneqassaaq. Taamaattumillu soraarnerussutisiaqalernissamut aqqissuussinermut peqataasussaataanermut tunngatillugu pisinnaatitaaffitit pillugit, taakkunungalu ilanngullugu toqusoqarnerani kingornussisussat allalluunniit iluaquserumaneqartut qulakkeerneqarnissaannut periarfissat pillugit, innuttaasut sukumiisumik paasitinneqarnissaat ataatsimiititaliap aammaarluni erseqqissaatigissavaa.

4. Siunnersuutip aningaasaqarnikkut kingunerisassai

Allanik oqaaseqaatissaqanngilaq.

Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqaatigiinneersut, Siumumeersullu siunnersuut akuerineqassasoq inassutigaa.

Inassuteqaammut tunngatillugu Inuit Ataqaatigiit aamma Siumut amerlanerussuteqarlutik ima

”Siullermik amerlanerussuteqartunit pisariaqarsorivarput pinngitsoorneqarsinnaanngitsoq inatsisip annerusumik Kalaallit Nunatsinni paasisutissiissutigineqartariaqartoq. Aappaattut inatsisip atuutsilersinneqarneraniit pissusissamisut ingerlasimanagera amerlanerussuteqartunit apeqquserparput, tassami inatsisip atuutsinneqarnerani marloqiusamik ileqqaartitsisoqarnerasoq maannangaaq uppernarsillugu nalileruminaatsikkatsigu. Taamaattoqarsimappat Naalakkersuisut piaartumik – tamatuma iluarsineqarnissaa siunertaralugu – aaqqiissutissamik siunnersuuteqassappata pissusissamisuussaaq. Pingajuattut pingaaruteqarpoq qulakkiissallugu inatsisip eqqortumik malinneqarnissaa aammalu inatsimmi ilaatinneqartariaqartut kisimik ilaatinneqarnissaat.

Sisamaattut isumaliutissiissutip suliarinerani amerlanerussuteqartut maluginiarparput, suli inatsit atuuttoq pitsanngoriaateqartinneqarsinnaasoq. Eqqarsaatigeqqunarpoq Naalakkersuisut piareersaatqarsinnaannginnersut, ileqqaartussaataitanerup minnerpaaffilernerqarsinnaaneraniq eqqarsaatqeqqullugit. Taamaaliornikkut maanna akissarsianit peersissutaasinnaasut, isertitaqassutsimut naleqqussarneqarsinnaanngornissaat anguneqassagaluarpoq, tamanut atoruminarnerusumik nammaqatigiinnerusumillu aaqqiissuteqarnikkut.

Tallimaattut utoqqaat pillugit periusissiamik, napatitsinermut siuariartornissamullu pilersaarusiamik aammalu akileraartarnermik aaqqissuusseqqinnissamik suliaqarnermi soraarnerussutisiaqalernissamut aaqqissuussinermut peqataasussaataitaaneq pillugu inatsisip ilanngunneqarnissaa amerlanerussuteqartut Naalakkersuisunut kaammattuutigaat, tamatumani siunertarineqarluni utoqqartatta inuuniarnikkut pitsaasunik atugaqarnissaannik pilersitsinissaq eqqarsaatigalugu maanna ileqqaarutaasussat annertussusiannik naliliinissaq.”

Ataatsimiititaliami ikinnerussuteqartut Naleqqameersup Demokraatineersullu siunnersuut itigartinneqassasoq inassutigaaat.

Inassuteqaammut tunngatillugu Demokraatit ikinnerussuteqarlutik ima oqaaseqaateqarput:

”Qularutigineqassanngilaq, aningaasatigut oqimaassaqqimmat naammattusaarinissaq, pisortanit utoqqalinersiutaannarnik isertitaqaraanni. Tamanna tunngavigalugu Demokraatit isumaqarput, silatusaarnerusoq privaaitut soraarnerussutisianik ileqqaaraanni, aningaasaqarnikkut toqqissisimasumik utoqqalinissaq anguneqarnerusinnaammat.

Taamaattumik UKA2016-mi amerlanerussuteqangaatsiarluta partiit IA, Siumut, Naleraq, Demokraatit aamma Atassut, soraarnerussutisiaqalernissamut aaqqissuussinermut peqataasussaataitaaneq eqqupparput. Taamanili innuttaasuni partiinilu oqallinnerujussuaqalerpoq, inatsit qanoq ingerlanersoq. Taamani tamatta isumaqatigiissutigaaarput inatsimmi siunertat pitsaasusut taamatuttaarlu isumaqatigiissutigalugu inuiaqatigiit ajornartorsiutigigaat, amerlavallaat utoqqalinissaminut ileqqaartannginnerat.

Unili ajoraluartumik nassuerutigisariaqarparput, inatsit siunertarineqartut atuutinngimmat. Assersuutigalugu takuvarput, inoqartoq, pinngitsaalisaasumik ileqqaartinneqartunik naak, allami soraarnerussutisiaqarnermik aaqqissuussami ilaagaluarlutik. Taakku saniatigut inatsit imaasillugu allanngortinneqarsimavoq, minnerpaamik isertitallit soraarnerussutisiaqarnissamut ileqqaartariaqanngitsut. Uffa taakku, aaqqissuussami pingaarnertut eqqarsaatigineqaraluartut.


Tamanna peqqutigalugu soraarnerussutisiaqalernissamut aaqqissuussinermut peqataasussaataitanermut innuttaasut sipaagaqartussaatilernissaat naapertuutinngilaq. Taamaattumillu soraarnerussutisiaqalernissamut aaqqissuussinermut peqataasussaataitaaneq pillugu inatsi atorunnaarsinneqassasoq Demokraatit isumaqarput”

Inassuteqaammut tunngatillugu Naleraq ikinnerussuteqarlutik ima oqaaseqaateqarput:

“Naleqqamiit ikinnerussuteqarnermut oqariartuut tunngaveqarpoq Inatsisartuni Partiit amerlanerussuteqartut immikkoortoq 141 itingartimmassuk, kingunerisaanillu peqataasariaqarluta maanna aaqqiinernut.

Innuttaasut eqqugaanissaat, avaqqunneqarsinnaannginnera ajuusaarnarpoq. Sualummik akit qaffakkiartornerat eqqarsaatingalugu innuttaasut kaasarfiinik aallerneq, utoqqalinissaannut ileqqaarinninneraarluni, puigorlugu ullumikkut aamma inuuniapiloorneq piusoq.”


Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappasaaniigassannngortippaa.




Hans Peter Poulsen
Siulittaasoq



Jens Frederik Nielsen
Siulittaasup tullia



Asii Chemnitz Narup




Mariia Simonsen



Lars Poulsen



Kuno Fencker



Jens Napaattooq